

瑜伽師地論卷第六十二

彌勒菩薩說

唐三藏沙門玄奘奉詔譯

攝決擇分中三摩呬多地之一

如是已說有尋有伺等三地決擇。三摩呬多地決擇。我今當說。謂補特伽羅多隨煩惱染汙相續不能正證心一境性。云何名爲多隨煩惱。謂有諂誑矯詐無慚無愧。不信懈怠忘念不定惡慧慢緩猥雜趣向前行捨遠離。輒於所學處不甚恭敬。不顧沙門。唯希活命不爲涅槃而求出家。云何有諂。謂自有過而不能

於大師智者同梵行所如實發露。云何有誑。謂不真實顯已功德。彼實無德。而欲令他諸有智者同梵行。等了知有德。云何有矯。謂於增上戒毀犯尸羅。或於軌範毀犯軌範。由見聞疑他所舉時。遂用餘事假託餘事。或設外言而相誘引。如經廣說。謂由諂誑增上力故。云何有詐。謂怖他故。或復於彼有所希故。雖有犯重而不發露。亦不現行。非實意樂。詐於有智同梵行所現行親愛恭敬。輒善身語二業。云何無慚無愧。謂觀於自。或復觀他無所羞恥。故思毀犯。犯已不能如法出離。好爲種種鬪調違諍。云何不信。謂於佛法

僧心不清淨於苦集滅道生不順解。云何懈怠。謂執睡眠偃臥爲樂。晝夜唐捐捨眾善品。云何忘念。謂於久遠所作所說不能隨念。不令隨憶。不守根門。不正知住。云何不定。謂於定地下至作意亦不能得。云何惡慧。謂住自見取執不平等難捨言論。云何慢緩。謂不捷利亦不明了。不自超舉無所能爲。不能以身供侍。有智同梵行者。云何猥雜。謂樂與在家及出家眾共相雜住。又樂尋思諸惡不善欲尋思等。乃至家勢相應尋思多隨尋思多隨伺察。云何趣向前行。謂受僧祇。或復別人諸衣服等所有利養。或請僧祇及與

別人皆名趣向。若諸苾芻於如是事最初前行。故名趣向前行。云何捨遠離軛。謂於遠離邊際臥具。遠離眾惡人所習。近似寂靜室。遠棄捨之。不生欲樂。云何於諸學處不甚恭敬。謂遭厄難。寧捨學處。不棄身命。志求身樂。及與壽命。不能隨護所有學處。云何不顧沙門。謂棄捨學處。好爲退轉。或犯尸羅行。諸惡法於內腐爛。廣說乃至實非梵行。自稱梵行。況當希求沙門果證。八支聖道。云何唯希活命。不爲涅槃而求出家。謂或爲王之所逼迫。而求出家。或爲怨賊之所逼迫。或爲債主之所逼切。或爲恐怖之所逼切。或爲財

寶常所匱乏。恐畏不活。而求出家。不爲自調自靜。自般涅槃。而求出家。當知此中依同梵行。而共止住。有所違犯。發起最初四隨煩惱。依增上戒有所違犯。當知發起無慚無愧。依增上心及增上慧。當知發起始從不信。乃至惡慧。諸隨煩惱。此中不信。及與懈怠。俱違犯。忘念散亂。依增上心違犯而起。惡慧。依犯增上慧起。不信懈怠。增上力故。當知發起。慢緩猥雜。趣向前行。捨遠離軛。忘念亂心。及與惡慧。增上力故。當知發起於諸學處。不甚恭敬。不顧沙門。唯希活命。不爲涅槃。而求出家。

復有三種補特伽羅。一依正法而出家者。二在居家受用欲者。三正法外而出家者。云何三處引隨煩惱。所謂最初補特伽羅。依放逸處引隨煩惱。此復二種。謂或依內妄顯已德。爲衣服等利養恭敬。自說已德勝過人法。或復依他諸有智者同梵行等。以身語業逼迫加害。損惱毀辱。當知第二補特伽羅。依耽欲處引隨煩惱。彼由耽著諸欲。因緣受用諸欲。依身語意行三惡行。當知第三補特伽羅。依邪行處引隨煩惱。略有三種。謂隨逐遠離。隨逐憤鬧。隨逐學處。起隨煩惱。云何隨

逐遠離。起隨煩惱。謂諸外道。隨逐遠離。所有臥具。而爲五蓋覆蔽其心。或住於苦。領受身心諸苦惱故。或復遠離煩惱。對治由離信等五種根故。彼由如是住染汗故。住苦惱故。無有對治。能除染汗苦惱住故。是名隨逐遠離。諸隨煩惱。云何隨逐憤鬧。起隨煩惱。謂各別執異見異欲。相違言論。建立自品。他品差別。廣起忿恨。乃至誑詔。是名隨逐憤鬧。諸隨煩惱。云何隨逐學處。起隨煩惱。謂觀自他現行諸罪。無有羞恥。毀戒穿戒。是名隨逐增上戒學。諸隨煩惱。若有依止世間等。至於其下劣計。自爲勝。或於相似計。自爲勝。心

生高舉。是名隨逐增上心學。諸隨煩惱。若少聽聞。不能觀察所有善法。是名隨逐增上慧學。諸隨煩惱。如是一切總略說。名非法之行。不平等行。由非善義。名非法行。非愛果義。名不平等行。

復次若觀行者。修十徧處。能爲五事。何等爲五。謂由修習地徧處等。乃至白徧處故。便能引法化事變事。諸聖神通。又由修習空無邊處一切處故。便能引發往還無礙。諸聖神通。又由修習識無邊處一切處故。便能引發無諍願智無礙解等諸勝功德。又卽由此識無邊處徧處成滿。便能成辦無所有處解脫。及非

想非非想處解脫。又卽由此成滿因故。便能證入想受滅解脫。最勝住所攝。又由識無邊處故。無邊無量徧滿行轉。是故此上不立徧處勝處徧處。是諸解脫能清淨道。又諸解脫。由所知障解脫所顯。由此聲聞及獨覺等於所知障心得解脫。

復次略由三相修等至者。愛味等至。謂或證得等至。出已計爲清淨。可欣可愛。可意隨念愛味。或未證得。或已證得。未來愛味增上力故。追求欣樂而生愛味。或已證得。計爲清淨。可欣可愛。乃至廣說現行愛味。若從定出。可生愛味。若正在定。無有愛味。言愛

味者。謂於是中徧生貪著。復次下地諸法若生上地。不現在前。上地諸法若生下地。其離欲者或現在前。若生下地於上起愛未得離欲不定心者。當言此愛是欲界繫。當知此愛或是染汙或不染汙。云何染汙。若生是心我今云何當證如是廣大喜樂所隨等至。若得證者我當如是如是愛味。又我云何當得生上常恆不變。當知此愛是染汙愛。若有起心專求離欲。欣樂證入上地寂靜。當知此愛是不染汙。

復有三種諸法斷滅。謂對治斷滅。現行斷滅。棄捨斷滅。諸煩惱事之所顯現。是初斷滅。諸行生滅之所顯

現。是第二斷滅。若生上地或入無餘依涅槃界。下地諸行及一切行棄捨所顯。是第三斷滅。

復有三退。一未得法退。二已得法退。三習行法退。

復依世間諸近分定。若方便道若無間道若解脫道。或爲斷滅。或爲證得而修習者。彼於所緣。或觀過失。或觀寂靜。觀下過失。觀上寂靜。若勝進道。當知彼是徧滿所緣。或無漏緣。復次諸近分攝六種作意。謂了相等乃至加行究竟作意。此中了相勝解作意。方便道攝。遠離加行究竟作意。無間道攝。攝樂作意。四種道攝。觀察作意。勝進道攝。

問。何緣故說修靜慮者靜慮境界不可思議。答。修靜慮者已善修治磨瑩其心有如是相。威德勢力隨所欲爲皆能成辦。非不如意法性故爾。是故說彼由尋思道不可思議。復有二種修靜慮者。於一事中俱發變事。勝解神通皆得自在。此二神通互相障礙。而此二通無偏大者不相映奪。彼後無間。一於此事神通無礙如其所欲皆能轉變。第二神通便被障礙。此中因緣云何應知。由彼二人勢力威德皆悉平等。俱時發起變現神通。然其所作互不相似。由彼神通所欲爲事不相似故。於此一事二種神通互相障礙。爾時

有一作是思惟。何因緣故我此神通今有障礙將無。我定有退失耶。此一定者即於此事起是餘心。第二定者即於此事數數專注心無散亂。所發神通能無障礙。隨神通力如意轉變。若二神通威德不等。隨其勝者所作成辦。若二神通威德相似。先作意者成辦非餘。

復有四種修靜慮者。一依近分定修靜慮者。二依染汙定修靜慮者。三依世間定修靜慮者。四依出世間定修靜慮者。於六作意謂了相等乃至加行究竟作意。修定轉時。當知是初愛上靜慮。廣說乃至疑上靜

慮當知第二。若住餘善世間靜慮當知第三。謂能引發現法樂住無量作意世間功德。又能引發遊戲神通。若順決擇分所攝受空無願無相解脫門所顯靜慮當知第四。

復次。無想等至當言唯一有漏。滅盡等至當言無漏。由與煩惱不相應故。非相應故。無所緣故。非諸煩惱之所生故。是出世間。一切異生不能行故。唯除已入遠地菩薩。菩薩雖能起出世法令現在前。然由方便善巧力故。不捨煩惱。又此等至當言非學非無學攝。非所行故。似涅槃故。

復次當釋隨身念經。謂心清淨行苾芻有四种隨煩惱。一毀犯禁戒。二散亂尋思。三保著內身。四保著外境。毀禁戒者。由憂悔門於三摩地能為障礙。亂尋思者。由三種門。一由於過去境隨念散亂門。二由依掉舉流散惡見惡聞惡語惡行唯樂聞思散亂門。三由先串習勢力所持散亂門。保著內身者。由於生死無厭患門。保著外境者。於未來境由欣樂門。當知此中為欲對治初隨煩惱故。修一作意。謂正知作意。為欲對治第二隨煩惱故。修三作意。謂稱順彼所緣作意。了別彼相能對治彼尋思作意。彼所依心調練作意。



爲欲對治第三隨煩惱故。應修分析積聚作意。爲欲對治第四隨煩惱故。應當修習不淨作意。又初作意修習多修習故。能斷忘念。第二作意修習多修習故。能斷保著內身外境二種貪欲。第三作意修習多修習故。能斷惡見等所有散亂。第四作意修習多修習故。能斷先所串習勢力任持所有散亂。第五作意修習多修習故。能斷於身淨有情想。第六作意修習多修習故。能斷四貪。所謂色貪觸貪。形貪及承事貪。如是作意修習爲依。斷隨煩惱。心觸正定。證得近分根本勝定。又能證得有喜離喜清淨安樂。又依如是正

定心故。如實了知。上地有情無常性。及諸行無常性。云何了知有情無常性。謂得天眼清淨過人。見諸有情。乃至廣說。云何了知諸行無常性。謂能隨入未來過去現在作意緣生智故。此隨身念依於三處。謂依增上心。增上慧學。修治業地。依增上心學處。依增上慧學處。爲欲斷除所餘諸結。修念住等所有一切菩提分法之所依止。由三因緣。不與一切外道沙門婆羅門共。謂於修治業地。資糧圓滿故。於奢摩他聚無有愛味故。於般涅槃愛樂隨逐。心非煩惱火所生處故。又此修念資糧圓滿爲依止故。四果清淨。謂處聚

落世法所生煩惱不染。處阿練若空閑所生煩惱不染。處阿練若聚落所生煩惱不染。於二處所不能堪忍。淋漏等苦煩惱不染。奢摩他聚無有愛味爲依止故。五果清淨。謂四種清淨靜慮及寂靜解脫。於般涅槃愛樂隨逐心非煩惱火所生處爲依止故。九果清淨。謂初三果及六神通。此隨身念當知五種清淨所攝。謂不定地清淨故。定地清淨故。攝清淨故。不共清淨故。不共果清淨故。又隨逐身轉故。彼所攝受故名隨身念。

復次。當釋摩訶俱瑟社羅經。有二解脫。一慧解脫。二

心解脫。此中依慧解脫。謂世間慧之所行者當知。卽是建立惡行及與善行并彼因緣。彼體性者當知。卽是惡行善行并彼因緣善不善等體性差別。如實正智。又依心解脫。謂心染淨之所依者當知。卽是色等境界能取了別。彼世間慧心解脫果。當知卽是於彼相應相雜下類雜染出故。卽慧解脫增上力故。出世間慧之所行者當知。卽是由世間慧及心解脫增上力故。如實了知一切境界卽出世慧心解脫果。當知卽是一切種類雜染出故。此中若世間慧若出世慧。總略爲一說。名正見。正見因緣當知卽是有佛出世。

聽聞正法無倒思惟。又出世間正見果相當知。卽是前後常故。無所對故。若法所治。若有生已無滅。所治若無滅。已有生。彼法名有所對。若法所治。若有若無。若生不生。常時是有。彼法名無所對。又卽此果。由心解脫。增上力故。於自所行及彼所依。得清淨者。當知卽是由清淨心。增上力故。於諸色根所行境界。不生雜染。及令諸根順清淨故。又解脫心住者。當知卽是壽之與煖。展轉相依相屬而住。又此世間及出世間二種解脫果差別者。當知卽是於諸受中及因緣中。有癡愛者。後有當生。無癡愛者。後有不生。又彼相雜

而相應故。彼能依止心法清淨。當知卽是非現在緣之所染。汗領受彼故。卽二解脫住差別者。當知卽是六寂靜故。由清淨識沒平等故。非由彼所依平等故。於入定時。不由加行入寂靜故。於出定時。不由加行出寂靜故。次第出故。於在定時。三行不行。得寂靜故。於遠離出心寂靜故。謂於三時。一於阿練若。與同梵行共相雜住。二於聚落中。與諸在家共相雜住。三於二處行相現行。於親近出心寂靜故。謂於三時。一於有色世間勝定出故。二於無色世間勝定出故。三於出世間有心定出故。又此諸定。非唯滅定出已。方得

亦先已得今起現前。此中前一。由次第定故。展轉獲得勝定清淨。後二。不由次第定。故然由通達無相界。故展轉獲得勝定清淨。又有相定。由有相作意入住。出定。若無相定。由無相作意入定。住定。由有相作意。當知出定。

復次。當釋法因緣經。謂於阿毗達摩阿毗柰耶中。善巧苾芻。或鄔波索迦。欲依解了。而請問者。當依八相而興請問。何等八相。謂解了事。解了所治。解了果。解了自性。解了果差別。解了所依。解了功德。解了證得。解了事者。謂能解了五取蘊故。解了所治者。謂愛

雜染及見雜染。由愛雜染。故於後有滅不生欣樂。由見雜染。故雖生欣樂而不能證。解了果者。謂此二種雜染永斷。解了自性者。謂八聖支道。此復種種差別。宣說對治。外道諸邪道。故名八聖支道。對治三種雜染。故建立三蘊。謂對治惡行雜染。故對治諸欲雜染。故對治諸見雜染。故。是出世間有為所攝。解了果差別者。謂諸斷滅。是出世間無為所攝。解了所依者。謂三摩地。此復四種應知。一由種姓。故謂所有定。一切皆由靜慮種姓。隨所宣說諸靜慮支。皆能解了。二由相故。三由生所緣相故。四由成辦因緣相故。解了功

德者。謂滅盡定最第一住。說名解了功德。當知此相復有五種。謂滅事故寂靜相似影像故。入定因緣故。出定因緣故。出定功德故。解了證得者。謂於五取蘊以八種相觀察諸受。謂觀察自性。觀察現法轉因緣。觀察現法轉滅因緣。觀察當來轉因緣。觀察彼二轉還。此中樂俱行對治。謂於最勝根本靜慮。苦俱行對治。謂得近分出離欲俱行。不苦不樂俱行對治。謂卽於根本靜慮。爲欲顯示轉因緣滅故。卽依諸受說所有受皆悉是苦。由彼三受約第一義皆是苦故。言相

對者。謂有此故施設於彼。是名相對。此中諸受展轉相對。由彼一切苦所攝故。又由有此第一義苦施設無智。由有此故施設治彼出世之慧。由有此故施設彼果寂滅涅槃。是故彼彼諸法說與彼彼諸法相對。復次當釋眠經。謂勤修習內心寂靜奢摩他行諸苾芻等。爲欲斷除諸隨煩惱。應知五種對治之相。謂遠離闇相。於能隨順舉歡喜法發生正舉。加行道理。損害諸見。諸見功用。諸見所依功用。彼隨煩惱旣斷滅已。復有五種任持定法。何等爲五。謂諸遠離遠離處所。順定言說。順無染心資生眾具。從有智者同梵行

所獲得隨順教授教誡美妙言說於諸世間等持等至遠離愛味及無漏行如理作意。

復次彼勤修習增上心學諸苾芻等由三因緣當遣現行染汙尋思謂遠離所緣故厭患自性故遠離自性故由三因緣遠離自性謂有對治力根猛利者能頓遠離無對治力根處中者如其麤相能漸遠離無對治力根下劣者於諸尋思因緣財食深見過患。

復次諸苾芻有六順出離界三摩地修習支者謂諸苾芻於閑靜室勤修觀行當知三種補特伽羅有三三摩地謂勤修習增上心者於四有情怨行惡行淨

行恩行有眾生緣定又勤修習趣究竟者有法緣定又勤修習諦現觀者有法緣定。

復次由三種大性大三摩地能令速疾通達眞如既通達已能盡諸漏謂由所緣大性故由精勤大性故由方便所攝作意大性故又有二遠離能令速疾通達眞如謂於行處遠離憤鬧及於住處離惡尋思。

瑜伽師地論卷第六十二

音釋 三摩呬多

此云等引謂勝定地中平等能引諸功德也